

Co vinavon cun la catscha da camutschs?

Il camutsch ei pertuccaus da malsognas, squetsch dil carstgaun e la midada dil clima

DA HANS HUONDER / ANR

■ **Il camutsch ei in dils pli fascinonts animals selvadis dalla muntogna. El vegn denton pli e pli sut squetsch. D'ina vart da malsognas, dall'otra vart entras las activitads dil temps liber dil carstgaun ed ultra da quei entras la midada dil clima. Quei ei la quintessenza d'in referat e d'ina discussiun da podi la sonda vargada a Tusaun.** Envidau a quella sentupada suandonta alla conferenza dils presidents dallas secziuns ha l'Uniun cantunala dils catschadurs da patent. Il svilup dalla populaziun dils camutschs fatschenta dapi onns las autoritads e biars catschadurs. Igl enconuschent biolog *Peter Meile* ha referiu la sonda davart la biologia dil camutsch, mo era davart las midadas che s'effectueschan pli e pli sin quei animal che viva el territori digl uaul entochen sisum la pezza. Sco part introductiva al referat ha *Hannes Jenny* digl Uffeci da catscha e pesca dil cantun Grischun presentau entginas datas davart la catscha da camutschs passada. Igl onn vargau ei vegniu sittau el cantun Grischun 2807 camutschs, rodund 350 pli pauc ch'igl onn precedent. En cumparegliaziun cun las meglieras catschas da camutschs ils onns navonta sedat ina reduziun da rodund 30 pertschien. El decuors dils davos onns ei la catscha da camutschs vegnida restrenschida: Pli paucs dis da catscha e da meins squetsch sin la caura. Perencunter ei la pressiun sils animals giuvens carschida. Tenor



Il biolog dalla selvaschina Peter Meile ha referiu la sonda vargada a Tusaun davart la biologia dil camutsch, mo era davart las influenzas negativas sin la populaziun da quella selvaschina fascinonta.

FOTO H. HUONDER

Hannes Jenny dumbra la populaziun da camutschs el cantun Grischun il mument rodund 24 000 tocs. Ils megliers onns vegn ei ad esser stau rodund 28 000. «Schegie che la populaziun ei se-reducida astga la situaziun buca vegnir dramatisada», puntuescha Hannes Jenny. Ils davos onns seigi ei reussiu da migliurar essenzialmein la struttura dils effectivs, surtut il diember d'animals dalla classa media seigi vegnius augmentaus. El constatescha ch'il camutsch ei exponius a differents disturbis, mo era alla concorrenza per la vivonda cun autras species dalla selvaschina sco la tscharva ni il capricorn. Buca da sutschazegiar ei era la

concorrenza per la maglia che vegn dalla nuorsa.

Spazi da viver ei decisivs

Pertuccont siu spectrum da vivonda ei il camutsch – aschia Peter Meile – singulars ell'Europa: «Ei dat negina outra specia dalla selvaschina d'ungla che sa senrir duront in pli liung temps aschi unilateral sco il camutsch. Quel sa magari mescal, bulius, jarvas ni era lenn d'ina plonta.» Il camutsch preferescha loghens suleglivi, sco refugis surveschan territoris fetg spundivs entochen a preitscrap. Oravontut ora el liber viva el enroschs. «En sesez ha il camutsch buc in

tipic spazi da viver. Per quei motiv eis el era da catar egl uaul», di Peter Meile. Egl uaul seigi el denton in prighel, oravontut per la regiuvaziun: «En in uaul da protecciun ston ins sedumandar sch'il camutsch duei viver.» Tenor Peter Meile untgescha il camutsch pastiras pasculadas d'animals da nez duront la stad: «El nezegia quei che vonza e meinsvart ei quei buca pli fetg bia igl atun.» La perdita d'animals – surtut anseuls e stargels – duront igl onn ora sa svariari fetg, numnadamein da 15 entochen 80 pertschien. In effectiv disfatg ha ditg da sevegnir, Peter Meile quenta cun diesch onns ni dapli. Ultra dallas malsognas che vegnan savens transportadas dils animals da nez, oravontut dallas nuorsas, ellas alps, s'effectuescha era la midada dil clima sil camutsch: «Egl avegnir stuein nus quintar cun dapli precipitaziuns igl unviern, seigi en fuorma da plievgia ni da neiv. Gest quest unviern havein nus saviu constatar ch'ei dat bia glatsch ed aschia po il camutsch buc adina contonscher ses refugis en territoris spundivs.» Fertion che las cauras prefereschan in territori stabel san ils bucs viagiari entochen 20 km.

Ein midadas necessarias?

En ina discussiun al podi han Peter Meile, il cau digl uffeci da catscha *Georg Brosi* ed ils catschadurs *Gian Reto Borsien*, *Werner Stucki* e *Domenic Camastral* allura discutau sut la moderaziun dad *Andrea Gilli* davart igl avegnir dil camutsch e dalla catscha da quel. Dalla discussiun

ei resortiu ch'il camutsch ei vegnius fermamein sut squetsch ils davos onns entras malsognas, mo surtut era entras las activitads turisticas dil carstgaun. Il spazi da viver dil camutsch vegn disturbau pli e pli. Georg Brosi constatescha ch'ei setracta en quei connex buca d'in fenomen grischun, mobein d'ina problematica che fatschenta era autras regiuns. Per Domenic Camastral ch'enconuscha la situaziun ell'Engiadina sto vegnir sedumandau schebein il camutsch ha insumma aunc plaz en differents loghens cun turissem. La damonda co agir egl avegnir, era pertuccont la catscha, ei cumplexa. «Schegie ch'ei dat differenzas ellas regiuns stuein nus reglar la catscha da camutschs sur igl entir intschess dil cantun. Cass cuntrari stuein nus quintar cun in turissem da catscha», di Georg Brosi. El constatescha che la tschoccad da camutschs ha giu in grond effect oravontut sin las cauras camutsch dalla classa media, gest quellus ch'ei decisivas per la reproducziun. Criticada dils catschadurs vegn medemamein la deraziun dallas malsognas entras las nuorsas. En quei connex drovi ei soluziuns pigl avegnir. In recept ha negin saviu presentar la sonda a Tusaun. Ina reduziun dil squetsch da catscha ei ina varianta, ina aunc pli radicala fuss in scamongd da catscha per camutschs sur in temps limitau. Il squetsch entras il turissem, las activitads dil temps liber, las malsognas, la midada dil clima e la problematica dils donns caschunai els uauls da protecciun restan denton.